



Nunat Avannarliit Suleqatigiinnerat Pillugu Nassuiaat 2017.

(Namminiilivinnermut, Nunanut Allanut Nunalerinermullu Naalakkersuisoq)

Nunat avannarliit suleqatigiinnerat nunanut allanut politikkitinni pingaartuuvoq. Nunat Avannarliit suleqatigiinneranni kissaatigut tusarneqartarput suliarineqarlutillu aamma nunani avannarlerni tamani kissaataavoq suleqatigiinnissarput nukittunerulernissarput siunertaralugu.

Tamanna tunngavigalugu pingaaruteqarpoq suleqatigiinnitsinni assersuutigalugu Issittumi pissutsit immikkuullarissut pillugit anngussisarnissarput. Pingaaruteqarpoq ilisimasatsinnik avitseqateqartarnissarput. Peqataanik aamma pingaaruteqarpoq tusarnaartarnissarput immikkoortunut ilisimasaqarnerulerumalluta nunani allani ukiut ingerlanerini immikkut ilisimalersimasat pineqartillugit.

Nunat Avannarliit ataatsimut isigalugit tusaamasaassutigaat meeqqanut atuarfiutitik aamma naliginnaasumik ilinniartitaanerup qaffasissusaa. Suut torrallattarpaat aamma taakkunannga suut nunatsinni atorsinnaavagut?

Demokraatit isumaat naapertorlugu nunani avannarlerni suleqatigiinneq ilisimasaqarnerulernissamut aqqaataassaaq aamma ilisimasalik avitseqatigiiffittut.

Taamaattumik aamma pingaaruteqarpoq nunani avannarlerni suleqatigiinnerup pingaartinneqarnissaa kiisalu ataatsimiittoqassatillugu nunallu ataatsimoorlutik ataatsimiissatillugit orniguttarnissarput. Taamaattuminguna Inatsisartut Ukiakkut Ataatsimiinnerat ukiut tamaasa kipitikkallartaripput qularnaarumallugu Naalakkersuisunut ilaasortat taamatullu Inatsisartut Nunani Avannarlerni Siunnersuisoqatigiinni ilaasortaataasa peqataanissaat oqalliseqataanissaallu ukiumoortumik Nunat Avannarliit Siunnersuisoqatigiivisa ataatsimiinneranni.

Ukioq manna ataatsimiinnisaaq ingerlanneqassaaq Helsinkimi aamma Demokraatit sinnerlugit peqataasussat tamaasa kissaappagut ataatsimiilluarnissaannik pissarsilluarnissaannillu. Neriuppugut uteqqikkumaartut nutaanik ilisimasaqalersimallutik isumassarsilluarsimallutillu.

Taamatut oqaaseqarluta Nunat Avannarliit Suleqatigiinnerat Pillugu Nassuiaat 2017 tusaatissatut tiguarput.